



MARA EVANGELICAL CHURCH  
**VACHHUH**  
MONTHLY NEWSLETTER



Volume 28

Monthly Newsletter

June 1/ 2021

### *Editorial*

**A** takô he eima rân ryureina riarina vâta chyhsa to hnabeidyna, nata chihuhna duahmo liata eima y. Râhchhôn adyuhna pipa chhao a vaw y thei awpa a lyu. Cha liata hro a pabohsa thei nawpa ta niedo a pachô awpa tlyma, phusa a pachô awpa tlyma, a rânna su phapa a pado awpa tlyma, tlôkhao a chao awpa tlyma eima tymâkhei chaina daihti chhao a châ. He hawpa rairuna nata chihuhna tawhta maniah a paboh theipa sakha deitapa cha Zisu Krista deita a châ. Zisu ta " Nâmo hriapasapa nata phaohripa zydua saih u, ei hnohta a vy teh u, cha pahâsa vâ ei na (Mt. 11:28)" tahpa ta maniah a aw hai. Ano tlai ta reih chanei ta, "Keima liata thlalôhpa ta nama y nawpa ta, khizaw liana heta riethei pasapa ta nama y tyh; chahrasala, thlalôhpa ngaitapa ta y teh u, kei ta khizaw ei tiah haw (Zhn.16:33)," tahpa ta a reih. Chavâta he hawpa duahmo eima tlôna liata Khazohpa deileipa ta a bohna hropa y vei. Chavâta atanoh he rairuna eima tyhna daihti lia Abeipa Khazohpa liata liahsa a pahnieh ei suh u.

Rairuna nata pasataona zy cha maniah patyhsa aw vei tahna châ vei. Chahrasala, rairu rietheina liata maniah a pabohsatuhpa a châ hri. Daniel viasazy a châpa Sadraka, Mesiaka, nata Abenekô zy cha Nebukhaneza abeipa dêryhpa a chapia haw eita, mei ta rao awpa duahmo liata y hra ei sala, ama sâ piekha chhao kê vei. "Ama viahpakao pasipa chhao anano leipa ta, ama chyhsia cha mei roh chhao pahnâh vei" (Dan. 3:27) a tahpa hawhta Khazohpa ta maniah a ypâ thlahpa vâta atahma hlata eima tyhpa rairunazy eima rân nata khih, chhônkhâ zy maniah vaw chapia pathlei hra sala eima hrona cha Khazohpa vâta aboh cheingei aw pita, eima hro liata chhao rairuna roh pahnâh hra aw vei tahpa a ngiapâ ei suh u. Atanoh rairuna vâta a pahlawpa tlyma, pachawparawpa tlyma, chihuhpa ta Khazohpa my pathlei kha ei su. Khazohpa cha rietheina noh ta eima bohna a châ.

### **Pastor tawhta châ Paphaopa**

"China" ta ngiapâtuha Marasaw chôta Bie a hneipa châ vei. Atahmâ hlâ eima Rân ryureina riarina nata COVID-19 tawhta hnabeidyna, apahlawna,

chihuna zy ta Rân zawpi mania a hria chy. Thâti haly chhihpa hlâ ta chihuhna thâti haly eima hry liata a zaw hluh via ta, COVID-19 hriia, patupatâhna, Rân chhôn chariah adyuna thâti haly zy ta chyhsa hropahâhna mania a pie lei kaw. Chyhsa hluhpi chihuhpa ta daihti eima hmâ. Khazohpa Bie tawhta eima sai nahta deikua la, Myanmar chyhsa châta hnabeiseih a chhihpa hluhpi a y. Izrael sawzy a chhituhpa Khazohpa ta Zisu vâta keimo chhao hro huhieh viana nata khihsa rao leina liata maniah a chhi thlâh aw. (Pua. 14:13) Mawsi hawhta Khazohpa lâ mona chôta zawpi lâta Thlalôhna bie rei hluh via a chhuah suh vy! Khazohpa ta mania âchâhkhei heih aw.

Khazohpa ta chyhsa hnohta bietaih peimawh kawpa miakha "Chi kha u" tahpa bie a pie. He bietaihna he Zawsua nata Izrael zawpizy hnohta piepa a châpa hawhta "Chi kha u" tahpa he keimo zydua hnohta chhao piepa a châ. Zisu ta Pathipalôh nôpo awpa mania pasaih rai vei. (Zawhana 14:1) A yzie ta chihuhna, nôpona, a panawhna ta chyhsapa laiseihna tao leipa ta Zisu liata ngiapâna deikua la, palôh riaphana, hnabeiseihna, thlalôhna zy tao ta, palôh riaphana ta chyhsa hro liata buana (Problem) hluhpi chhao a pathlâ thei. Chavâta eima hnohta Khazohpa Ao cha "Zisu lâ moh ta, hnabeiseihna hneina chôta daihtizy hmâpa ta riaphapa ta rai chakao pha chyupa he eima taovyuh a châ chai aw. Khazohpa cha a sawzy aboh n'awpa ta tilai pi chô liata lâpi atao thlahâ khih la, atahmâ hlâ pasaipa-ipa, reikheituhpa nata baotuh hneileipazy châta ABeipa lâpi taopa a y aw tahpa ngiapâna nata thlachhâna ta hmiala tôh lyma suh vy.

*Rev. Dr. Si Khaw, Associate General Secretary*

### **Covid- 19 nata Hindu zyhna**

March tawhna khata Covid-19 eithôhna tily cha India rân a vaw chanaoh heih. Atanoh taihta athipa tei 3 hlei ama pha haw. Tlâh leipa hluhtupa vâta mohôn tiah khao leina taihta pha eita thokhazy cha lâlai kiah zy liata thi eita Delhi khihpi zy liata cha a thipa mei ta ama raona suzy tlyh khao lei ta ama pakawh via ngâ hra. Hindu Guru (Pastor-zy) ta viachao-ie ahnia ula Covid-19 tawhta nama tlâh aw tahpa bie ama phua.

Chyhya reitiah'leipazy cha viachao-ie ahnia eita ama tlâh hlei vei. Achhâna ta Hindu nothlahpa eima chyhna he tlâhna miah pie thei vei tahpa ta ama thy khai haw. Indian Times thâti bu rei dâh ta cha, he vâta achyhna a hneileipa hluhpi vaw pua aw eita thokha cha Krizyhna lâ a pathlaipa ama hluh ngâsâ aw tahpa ta a reih.

### **Mission Section**

1. Rev. S. Lathai (Mission Director) cha ama chhohkha ta ama chakaona awpa su Sittwe Office cha a ly kawpa ta ama tlô haw tahpa thâti daopa a châ. Field chhoh zydua Rev. Daikau (Asho Field Secy) deikua a sawchanô tlâleina vâta Yangon lâ ama zupa vâta Field liata vaw pangai thei mâh vei.
2. Mro nata Myo/Khami, Vakong Field liata IDP Camp thokha Rakhine râh thlipi vâta thokha a raokhai haw. Thokha mo chyh viapa zy cha ama yna lâ ama pangai ngâlâpa hawhta thâti eima daopa a châ.
3. Mission sôh he atakô eima daihty kaw. Matupi Bia nata Yangon Bia liata a ypa Bank liata Awnanopa sôh a thao mah leipa vâta; Foreign Mara Awnanopa lâ tawhta sôh a paphaona rairu kawpa vâta nata ECM tawhta sôh paphaona a riaru kawpa vâta zy ta a châ. Chavâta Mara râh chhoh Local Mission Board zy ta Thlachhâna chô ta Beiparisôh he tiama viapa nata sôh chhao Office lâ Thlakha eikha chhao rai Biatuhpa/Pastor zy hnohta nama hlâ chyu bei awpa nata Mission chakao eima daihty lein'awpa ta thlachhâna chô ta Awnanopa lâta ahawna eima cha hnei.
4. Vakô nata Mro hlabu châta Project baona Synod (4) zy ta Ks. 1,500,000/- kha ama vaw pangia ngâ hai. Thokha vaw pangia mâh leipa ama y chy. Atakô liata thlai hlabu ama vaw papua thei nawpa ta thlachhâ a bao chyu suh vy!

### **KNP Section**

2020 kô liata Covid-19 hriiah vâta khizaw nôzy noh nata KNP adua nohzy ahmâ thei vei hra ei sila, ABeipa ngiachhiena vâta 2021 liata cha, eima râh riaru kawna daihti châ hrasala, local hluh via liata a rônah kawpa ta KNP adua noh hmâ theipa a châ. Local thokha liata cha, khizaw nôzy noh liata nôzy lâta Local Standing hmalapa ta palyupalihna hmosai pie ei ta, thokha cha KHP zy ta pawpi piepa ta ama palyupalih.

Thokha Local liata cha KNP adua noh liata nôzy pawzy, hawtazy tawhta palyupalihnazy ama hnei theipa vâta aly a chhi kaw. Eima noh peimawhpa liata a palyupalihna he hmopha ngaitapa a châ. Eima râh chhao ta novâhnazy eima hnei via lymapa vâta aly a chhi kaw.

Nôzy ta eima noh liata palyupalihnazy eima topa hawhta, palyupalih tlâhpazy he a daihti ta liata palyupalih thei hra awpa ta hmophapa achu suh vy. Eima khizaw he chhie tlôh ta pakha nata pakha a palyupalih ta tha apapawhna daihti, a palysana daihti ta hmâ su vy.

### **KTP Section**

1. Salem Local Church (Chakhai Bia) cha May 8, 2021 noh liata Local Awnanopa miakha ta a vaw dua eita atahma Local KTP chhao May 9, 2021 ama padua thei hawpa vâta KTP CC ta tha ta eima lykhei. Khazohpa ta Salem Local KTP he byhnâ pie sala ano Khinarâh châta hmâpha lyma maw ei sy.
2. KTP Property zydua cha KTP Hqrs., yna su liata so khaipa châ haw ta Awnanopa moh ta a hlâ khohpazy cha asaipa ta a hlâ theipa a châ. Ahlâtuhzy cha Property a mohôtuha (KTP Secy;) lâta azaopa a châ aw.
3. KTP Hâta nata Aduana Noh cha June 3-9, 10, 2021 lia ahmâ awpa châ ta, Local Awnanopa sahlao zydua nama hmâ/hlaopha lyma awpa ta Krista Moh ta eima cha haw.
4. KTP Hâta chhoh liata tao awpa ta KTP CC Bie pathlupa zydua cha ngâchhi kawpa nata phahnai ngaita kawpa ta Local KTP to tao chyu awpa ta khokheina eima cha hnei chanei ei.

### **SDD Section**

Pathei (N) Local liata MEC SDD ta hmalana ta chichei/bialona kyh Training cha May 11-12, 2021 liata taopa a châ. Achuna he hlaotloh kawpa ta pachhâ theipa châ ta achupazy ama thohkhei kawpa ta pahno pita eimâ ly ngaita kaw.



Pachutuhpazy cha:

1. Mch. Sabei (LLP) ta "Chheipâh Pabohsana nata Ativyhna"
2. Mch. Zaphetha (Director- TPA) ta "Alei pahâh taona nata Chemical ta taopa sibiepa thiena nata lô-ah thiena thohna hmâ pha leinazy"
3. Mch. Zasaw (Treasurer) ta "Ihmypa chicheina kyh, sadô su atlyna kyh, Coffee lophana kyh " kyh zy ama pachu.

He training pachhâ tawhta khitiâh châta hria awpa hma la tua chai awpa châta wzy cha:

1. Chicheina he tiama viapa
2. Tihnew pabohsa awpa
3. Lyurâhpa pabohsa awpa
4. Tho tina a tlyuh thei nawpa ta chakoh phapa hnei khai awpa
5. ဝိုးသတ်ဆေး၊ ဝေါင်းသတ်ဆေး hmâ lei awpa
6. Vao hrai ta paly awpa
7. Chheipâh pabohsana noh nata thokô lona noh liata chhôn to thokô lo khai awpa
8. Khih to ta apualeipa thyna su hnei chyu awpa zy he a châ.

Eima râh hmasiena châta tao chyu su vy. Pathei N Local ta achu theipa zydua châta May 15, 2021 liata Zâ pati nie maniah taopa eita eima ly kaw.

**SALEM LOCAL THIEHPA NATA ACHHYNA O PAHYNA**

Chakhai Saku vaih cha 2020 Assembly ta Salem Preaching Station pie ta 2021 AEC (Sabawngpi) ta Local thiehpâ a pie. Salem Local thiehpâ nata Achhyina o thiehpâ cha Rev. Dr. Si Khaw (AGS), Pro. P. Sanlwin (KTP Secretary), Pro. P. Serô (KHP Secretary) nata Pro. P. Mela (Taubu Biatuhpa) zy ta May 8, 2021 (Sat) noh ta ama pahy.



**Chapy khih liata o meikana eima tyh**

May 24, 2021 (Mon) Za – 11: 00 liata Chapy khih liata o dyh dythôn cha mei ta a kê haw.

1. Pastor Vate (LABC)
2. Evan Chôleitha (LABC)
3. Pupa Khaihu (MEC) zy o cha hmodah sâkha hmata lâhmâleipa ta a zydua ta a ka haw.

MEC Office tawhta Rev. Dr. SiKhaw (AGS) nata Pro. P. Serô zy, Rev. Beilawkhai, Rev. Matei, Rev. Meitha, Rev. Tlabie, Rev. Bievakhai, Pro. Salua nata Rev. Sehra (LABC Lawthatla) zy ta vaina ama hnei. Khi (20) tawhta awnanopa nôpawzy ta o a kêpa chhônkhâ liata thlachhâ tha patlonazy ama hneipa dei châ leipa ta MTP sahlao mo 390 hlei zy chhao ta o sâthôn châta raihria a pachhaihpa ta tiama kawpa ta 27/ 5/ 2021

(Thur) noh my ta o cha ama pangoh khai hawpa châ ta; thlai ama tlôhpa thei haw. He hawhta lahla lahnia tawhta thlachhânazy, hmosai baonazy nata thaza cheingei ta o a vaw sa kheituhpa zydua hnohta alyna bie eima cha hla hmeiseih. Nama hmopha taona chô liata Abeipa ta byhnâ chapie chyu mawh ei sy.

Pro. Pastor Bielehmo (Biatuhpa Chapy)

**Amopâtlah a châpa Para Local KTP**

Para Local Mission Board nata KTP sahlao mo (50) ta keimo Tlopi Local Church lâta 8.5.2021 nota synod (1) Mission Board zy Biepathlupa yzie hawhta Laytu Field Tulezaw Quarters sana awpa châta deichhyina sôh tluana ama vaw hnei. Cha ama chakaona khô lâta Para Local KTP sahlao meba (39) ta Evan. Vabeikho lyu thlaopa eita, cha dei châleipa ta Ramaw Pôh 200 chhao ama vaw chhawpapâ hra. He Para Local KTPzy hmopha taopa ta ama chakao raihria he, kei chhao a rônah tah ngaita nahta amopâtlah a châ hmeiseihpa ta ei pahno. ABEipa ta he KTP sahlao chô lia ta byhnâ pie via lyma ei sala he hawhta hmopha tao chakaona liata thâ patlô via lyma maw ei sy,

Mch. Paiko  
Synod-1, Chairman, Tlopi

**Hloma Local Church Ahmâna thâtih**

Eima râh Awnanopa nata nôpaw zy ta thlachhâ kheina theilapa eima hmôpa cha April 26, 2021 tawhta May 6, 2021 taih eima Local Church liata Rev. Tlabie (Biatuhpa), Evan. Silao nata Evan. Nichhâ zy miah Khazohpa Thâtihpha Bie ta mania hmâ kheie eita, ama biepipa cha “ Khazohpa apahnopa thyutlia” tahpa a châ. Hâta eikha a hmâkhei awpa ta thlachhâpa a châ tarawpa chhao, Khazohpa Thlahpa a phualuana vâta KTPzy ta mothli chhao ta tha ta ahrana ta noh taihpa hlâta pasi viapa ta ama hmâna eima hnei. Eima Local liata ABEipa vâta ahrana byhnâ tha ta eima dao. Daihti achhâ nata Vao sô 6 ta Awnanopa ta ABEipa liata Alyna kyhchhi rônah ngaitapa eima tao. Awnanopazy tha ta a thôkhei hmeiseih pita eima lynazy a ki ngaita kaw. ABEipa ta MEC râh Awnanopa nata nôpawzy thlachhâna a chyei hmeiseihpa ta pahnopâ a châ. ABEipa Zisu Moh he tlyzaw reithaipa ta y mawh sy!

Hloma Local Church

**Pasai local liata KTP Ahmâna Thâtih**

May 10-17, 2021 chhôn ta “Khazohpa Apahnopa Thyutlia” (Bch. 12:1) tahpa biepipa hmâpa ta Evan. Vabeikho, Evan. Niechhâ, Evan. Silao, Pastor Aung Myint nata Pastor Pa Hmo zy chhithapa ta Thâtihpha Ahmâna cha Pasai local liata ama hnei. Biechhotuh-pazy dei châ leipa ta MEC KTP ta a palaikhei ngâsapa Laisa Khopha (MEC-KTP Female Idol 2019) nata Satlia



Daniel (MEC-KTP Male Idol 2019) zy chhao thuytliazy tha patlô awpa ta ama vaw tlô hra.

Khieh chheipâh KTP sahlao hluhpi - Teina, Chakai Old & New, Sabyhpi, Lialaita nata Lialaipei tawhta KTP sahlao mo (67) - zy chhao ahmâna ama vaw hlao hra. Khiehchhai nata khichhôn thuytli maluh (182) zy Camp angiapa ta thâtihpha bie ama chu. Abeipa ta biechhotuhpazy siepahliepa ta thuytliazy lâta rônah kawpa ta a phualuah. Thâtihpha bie a theipa zawpi zydua a ly kaw sai ei ta, hla nata bie a pahâh hmeiseih.

He ahmâna hlaotloh thei nawpa ta thlahchhâ a vaw bao theipa, sôh nah baona chi nano nanopazy ta a vaw piepasai theipa nama zydua chô liata Zisu Krista moh ta alyna bie eima cha hlâ.

*Mch. Khin Mg  
Local Secretary, Pasai*

### Salapi Local liata Ahmâna Thâtih

Abeipa chhithana vâta moleina tawhta pachhana tahpa bietlâh hmâta Salapi Local liata Rev. Ma u nata eima Pawhrapa Hyutuhpa Ralao zy ta May 24-28, 2021 taihta thapasa ngâsâpa ta miah a hmâkhei eita, Abeipa mohta byhnâ eima to hmeiseih, KTP sahlao ahlaot thei pa (45) phapi ta Siku o liata ahraikhôpa ta taopa a châpa vâta khichhôn Awnanopa nôpaw members zydua ta niedo zydua aly kawpa ta miah patôhpatia kheh ly ma eita, arôhna hmeiseih. Eima speakerzy chô liata Abeipa ta byhnâ pie ei sala tahpa he eima thlachhana chhao a cha.

*Mch. Lainga, Salapi*

### Hyutuhpa Mch. Kholai miah pahâsai

Heimata local Hyutuhpa Mch. Kholai (Khaisili paw) cha chhôn lâ tlâhleina vâta May 18, 2021 noh zâ liata local awnanopazy nata chhônkhâ zydua hnohchhpa ta taotuhpa Khazohpa hnohta miah pahâsai haw. A siesai chhônkhâ nata a local sahlao zydua châta thlahchhâ kheh chy su vy.

### Pinô Lalthianhlimi Biehra ku ta a chapai

Khazohpa Biehra Pathaihpa Athaona bu tawhta Biephuah bu taihta kuropa ta ei sari a roh theipa cha Pinô Valnglaini tahpa ta thatih bu ta a palâsa.

- Bu (1)na Noh 428
- Bu (2)na Noh 299
- Bu (3)na Noh 384
- Bu (4)na Noh 335
- Bu (5)na Noh 254
- Bu (6)na Noh 165
- Bu (7)na Noh 206

A rohna liata châsoh apachhapa zydua 524.

### Pahnosana

1. MEC Calendar liata palâsapa "Mara Biehra Noh" cha July 5, 2021 (Monday) tahpa vyuhpa ta, July 5, 2021 (Sunday) noh ta hmâpa a châ aw.
2. Vachhuh News nata KTA he a pazaopa deita paphaopa a châ aw. Chavâta local ta tlyma, Department ta tlyma, News nata KTA a dao khotha office lâta a vaw pazao chy awpa ta pahnosana nama châ.
3. LFA (Local Farmers Association) Board paduapa list he Office lâta a paphao mah leipa Local zydua, Board paduana yzie hawhta nama vaw paphao chatlie chy bei awpa ta eima cha pahnosa.
4. Coffee chi he nyu kha Ks. 2,500 nata Monyuh Thei chi he byh kha ta Ks. 500 chy ta Lialaipei office liata June thlah chhôn liata nama vaw chalei chy awpa ta pahnosana nama châ.
5. KHP Seal thiehpâ cha KHP Secretary, Hqrs., Lailenpi liata MMK 15,000 ta chalei theipa a châ .

### June Thlah chhôn Awnano Noh Peimawhpazy

Thlah/Noh	Noh Peimawhpa	Remark
June 4-9, 2021	KTP Hata	Guide bu a pua
June 10, 2021	KTP Adua Noh	
June 20, 2021	KPP Adua Noh	
July 4, 2021	Mara Biehra Noh	

### Mara Biehra Paliena Kô zy

Kô	Biehra Paliena Yzie
1911	Thâtihpha Zawhana châbu palie khai
1912	Thâtihpha Zawhana châbu chhuh khai
1923	Biehra Thiehpâ Palie khai
1927	Biehra Thiehpâ chhuh khai
1951	Biehra Parohpa Palie khai
1954	Biehra Parohpa chhuh khai
1956	Mara Holy Bible chhuh ta, papua hawpa